



# LA ARLeF TAL MIEÇ DE INT

## Vignît a cjetânus tes manifestazions ator pal Friûl

La Vierte e je rivade. La bieie stagjon plene di colôrs, di profums e di ativitâts tal viert si è fate spietâ ma o podin di che, di cumò indevant, nus spietin dome zornadis di soreli, o cussi al varès di jessi.

Il Friûl al è la tiere de convivialitât e dal bon acet, là che la ufierte di ativitâts e je cetant siore, sedi vie pe stagjon frede ma, ancjemò di plui, vie par chê cjalde.

Di fat, dongje dal nestri paisaç che, se o impegnassin ogni dì par lâ intun lûc, no varessin dal sigûr avonde timp par preseâ dut ce che la nestre tiere nus regale tant che monts, lâcs, mâr, lagune, culinis, flums, e no dome, o vin ancje la fortune di vivi intune regjon simpri ative ancje par ce che al inten la ufierte di events culturâi e enogastronomicis.

Un Friûl che al risalte pe sô vivarositât, che si fâs inmò plui fuarte cul tacâ de bieie stagjon, e che si met in mostre pes sôs peculiaritâts, pes sôs bielecis che a cjapin dentri il teritori te sô totalitât, tacant dal aspjet paisagjistic fintremai a chel dal bon mangjâ, midiant di apontaments che di agns duçj nô furlans o cognossin.



Credits: pagjine FB Saponi Pro Loco

Propite par cheste reson, ancje la ARLeF, Agenzie Regional pe Lenghe Furlane, e je presinte dilunc dal Istât dentri des manifestazions plui grandis e preseadis de regjon. Parcè che dongje des tantis carateristichis e particolaritâts dal nestri teritori, e je ancje la lenghe furlane.

O sarin di fat presints a **vicino/lontano**, manifestazion culturâl che si davuelç a Udin dal 2005 e che e ufris incuintris, dibatits, conversazions, conferencis, mostris, spetacui tai edificis plui sugjestifs di Udin. La ARLeF e jentre tal program dal Festival cun **“Furlan, lenghe di dongje e di lontano”**: cuatri apontaments a tacâ di vinars ai 11 di Mai cu la conference “Improibit fevelâ: lenghis vietadis, emigrazion, plurilinguism” e po la proiezion di “INT/ART Sintî local - Agjî global - seconde serie”.

Ma no dome, di fat ancje pai frutins a saran doi events cun leturis animadis e premis, sabide ai 12 e domenie ai 13 di Mai.

La Agjenzie e sarà presinte ancje tes manifestazions enogastronomicis plui cognossudis dal Friûl tant che **Saponi Pro Loco** a Vile Manin di Passarian di Codroip, **domenie ai 13 di Mai**.

Ali nus cjararès cuntune postazion promoziônâl e informative cun tantis novitâts e gadgets e o podarès lei ancje i menûs di dutis lis Pro Loco voltâts par furlan. O sierarìn il mès di Mai a **Cormons**, te **Fieste da Viarte** te Mont Cuarine, **domenie ai 20 di Mai**, li che o sarin cul stand ARLeF prons a dâ informazions su la lenghe furlane e su la ativitât de Agjenzie.

Us consein di tignî controlât il nestri sît internet [www.arlef.it](http://www.arlef.it) e la nestre pagjine Facebook par cognossi duçj i detais su chescj prins apontaments de bieie stagjon cu la ARLeF, che a laran indenant ancje tai mès di Lui, Avost e Setembar.

Vignît a cjetânus!

